

67376

Al Bibliotecar: Idcâl
l'editor

Dispense N. 1 Presit 80 cent. Conto Corrente postale Dôs dispensis al mê 1 Març 1929 - VII

ARCHIVI

de leterature furlane

antighe e moderne

*Biele lenghe furlane fortunade!
cu-mò sarâ di te pûr fate stime
e plui d'ogn'altre tu sarâs loldade.*

GASPAR CARABÈL (Rumîdt)
cirche 1630

Cheste dispense 'e contén:

Guidón Salvadi (Guido Podreche) - LA STRIE
par i ans 1887 - '88 - '89.

Costantin Smaniotto - TITUTE LALELE
comèdie in tre aç.

Osservaçions. — Qualchidûn calumând il non di Guido Podreche, ritignût framassôn, al stuarzarâ il nâs. L'ha tuârt parçê che se al lei al viodarâ che la STRIE nò contén propri nuje che al puedi nâncie lontanamentri ufindi la religión catòliche. Cui chê al judicâss sençe lei al farêss come chel tâl che, avind vûd diviârs duei par sustigni la superioritât dal Tass su l'Ariost, ta-l ultim, ferîd a muârt, l'ha podût dî cun-t-ûn fil di vôs a chei che lu assistevin: E pensâ che nò hai mai let né la Gerusalemme né l'Orlând Furiôs.

Del rest' te-s dispensis futuris si publicarân ance componimênc di autôrs che han indirîç dal dut diferênt sençe lâ tant a indagâ e ance prêdics a condiçion che si giavin da l'ordenari, che sein spiritosis, che rifletin il Friûl, e lis tendencis, lis condiçions e i costûms atuai dal popul.

Se qualchidûn al vess componimênc inediç dal Podreche, detâç par furlân, l'è preât di comunicâ-jû. 'O vin pudût consultâ nome lis anadis III - VII dal Forumjuli, periodich setimanâl di Çividât. L'è probabil che in giornai o in numars unichs si ciatin altris poesîs di Guido. Dopo finîd di stampâ dut chel che cognoscin, si publicarâ in brêv la vite, 'O sperin po' che qualchi competênt nus mandî la critiche de òpare leterarie furlane dal nestri Salvadi. Essind la publicaçion fate sore-dût par il popul sarâ ilustrade da notis che nò ocoraressin pa-i studiâç.

Al librârs e rivendîtôrs. — Il pajamênt al devi sei fat al plui prest sul CONTO CORRENTE POSTALE N. 8-69 di A. TELLINI, Udin, Plaçe VII. Em. 9 A. Nò si ricevin indaûr dispensis che nò sein perfetamentri conservadis.

Ognl Persone 'e podarâ contribui a la difusiôn da l'òpare, mandânt l'impuârt di almanco 5 dispensis da rivendî ai cognoscinç. Al gioldarâ il ribass dal 25 per cent.

Par favori librars e rivendîtors nò si fasin abonamênc individuai, né si spediscin còpiis isoladis in Friûl.

Stabilimênt Tipo-Litografich BEPO TABÀCH — Sandenêl dal Friûl

Dispense imprestade, jê dispense piardude o almanco uastade

TITUTE LALELE

Comèdie in 3 aç di COSTANTÍN SMANIOTTO

riglavade dal "LUNIS DI TITUTE LALELE,,

PERSONIS DE COMÈDIE

Titute Lalele . . .	casulin di Surisins	Cándide . . .	massàrie, ciargnele
Venânçio Vigolato .	speçiâr	La Sartore . . .	
Mòmolo Bressân .	segretari comunâl	Agnul Basandiele . . .	
Esterine . . .	fie di Titute Lalele e di	Mariute . . .	
Lúçie . . .	fèmine di Titute	La Comari . . .	

Pre Noçént

Un finèl in clase di Titute Lalele

AT PRIN

(Lúçie cui ciavei taiâç a la garzón 'e sta contrastând cu-l marît, che in plui dai pinsîrs e dai fastidis pe' iminènt nòmine a podestât, l'ha âncie la preocupaçion che chest gambiamént al puedi 'vê influençe su la sô nòmine. Esterine 'e vai donge so mari).

TITUTE — Ma j va di mièç la podestarie, capîsci-le!

LÚÇIE — 'O vin za pensât e decidût çe che vin di fâ par nò seciâ-ti lis merindis in merit a la podestarie; e finîsci-le, se nò come ch'a l'è vêr Iddio.....
(a Esterine) Nò sta vai tu, lasce fâ di me....

TITUTE - Ma nò viodés-o, Dio bonino, che mi semeâis lis balarinis che van a Udin pa-l merciât di S. Catarine? (a Esterine) E tu? cródis-tu di ciatâ plui a la svelte il merlo, cuinçade in chê maniere?

LÚÇIE — Par me fie 'o pensarai iò, sençe che tu ti preòcupis tant. Domán 'o partîrín vie di ca. Vué 'e sarâ ca la sartore o po' ti lassarín bessôl.

TITUTE — Lèssis-o a cia'-dal-diaul (al ciamine sú e jû pe' ciâmare, gnarvôs)

LÚÇIE — ('e lasse el so ricâm e si jeve sú) Tant iò che me fie 'o sin stufis di jessi simpri sacrificadis in chest paîs pedoglôs e ricuârdi-ta-l une volte par simpri, che nô-altris 'o volín navigâ cu-i tîmps che corin e jessi riveridis da dutis lis personis dal "bon ton,, come ch'o meretfn....

TITUTE — S'o vess ca une colubrine o farèss un delît...

LÚÇIE — (continuând) E po' se ti nomenarân Podestât, se ti nomenarân, 'o dîs, iò 'o deventi la podestârie e nò vuei che nissún al vedi çe di sul miò cont e specialmentri sul to.

TITUTE — Dôs pipinatis di cere 'o semeâis, dôs pipinatis.

UD NUOVO 1929-
TT NOCCIOLA
ETICHETTA 1933

LÚÇIE — (*a Esterine*) Nò stâ vai — (*a Titute*) Dunce une tâl càriche 'a ti compuarte une famee moderne e nò de int a la buine come che sin simpri stâç. Un sposalizi in tichete par Esterine e une fèmine che ti puedi stâ vissín sençe fâ-ti scompari. (*Al va dúngie a Esterine e j fâs corágio*)

TITUTE - E iò 'o scompairèss in chest momént mìl metros sot tiare. (*sòl*) E dovè gloti dut par nò fâ scándui.

LÚÇIE - Nò cumò 'o lin disore a preparâ lis nestrìs valìsis e se tu nò tu ùs vignì cun noaltris fâs di mancùl, che nò 'o savín navigâ lo stess. (*a Esterine*) Anín Ester.

TITUTE — Ma 'e vès propit decidùt di lâ vie domán? E a Vignésie?

LÚÇIE - Domán sí, domán, che sin stufis di stâ dut l'an a inrusinî-si in chest paìs di contadíns. Ai bagnos e po' in montagne!

TITUTE — Ma lait al diaul e nò steit plui a tornâ donge. Che il mar al deven-tàss tant alt che 'us inglotìsc vò-altris e chei che 'us han metudis sú.

LÚÇIE — (*'e striscine vie Esterine*) Anín, anín, lasce ch'al zorni tant ch'al ùl.

SCENE SECONDE

(*Titute sòl dopo un momént di páuse*) — Un colp, un colp..... Se nò mi è vignùt un colp 'a l'è stât un don di Dio (*al bèv un sors di aghe di vite*). Peráule che iò 'o soi iò, Titute, ma mi pâ di jessi d'imprèst.... un cadavar ch'al ciamine. (*al torne a bevi*) Dut 'o varèss crodùt.... che Esterine 'e foss diventade mate che 'l folch la podèssi-al trai, ma che Lúçie, la me Lúçie dopo vingesínch ans di matrimoni, 'e vess piardùt il ciâf. (*al bèv ancimò*) E dopo la int j dis carogne a un puar disgraziât che al comèt un delít.... E lu farèss, cròs di Dio, che lu farèss se nò j foss di mièç la podestarie. (*al clame la massàrie*) Cándide, Cándide.

SCENE TIERÇE

CÁNDIDE — (*'e fevele ciagnèl*) Clamávi-al lui, siôr parón?

TITUTE — In-d-ulá son-o cu-mò lis mès fèminis?

CÁNDIDE — Son ladis disore, siôr parón, 'e mi han fat portâ sú lis valìsis co' vevì finit di netâ.

TITUTE — (*avilît*) Ce parón, ce parón; clámi-mi Titute o Tite, che tu sès plui degne di lór di clamâ-mi cussí.

CÁNDIDE - Nò i olçi, siôr parón.

TITUTE - E tu ciòl un sold di olçe. Cumò, viòdis-tu, nò mance altri che ance tu tu piardis el ciâf, e po' si pò meti fûr de ciase un cartèl "COMPLETO". Oh! viot che devi rivâ la sartore, mi pâ di 'vê capît... 'E puarte la rivolución ance chê.

CÁNDIDE — Mì lu han dite ance a mi. Chê, viódi-al, ur insegne dutis li malísiis.

TITUTE - Cròs di Dio e Marie Santíssime! se nò jé vere che la sartore 'e ha mitùd la rivolución in ciase me. Ma 'e vignarán a conç ance cun me... 'E devin ben vignì par tirâ bêt....

CÁNDIDE — (*in confidence*) E ance qualchi morôs di fora-fora, di chei che han passión pe's femenutis a la mode.

TITUTE — Di po' Cándide.... sas-tu alch? Di chê pítme di me fie 'o lu sai za.... l'è un cièrt Alfredo che al si è piciât daûr in chê sere dal fiestín in ciase dal Sindich. Ma da me fèmine....

CÁNDIDE — (*come prin*) 'E jé mode ance chê.... come chê dai ciavei....

TITUTE — Anín, anín no stâ mèti-mi griis 'ta-l ciâf. Lúcie jé rúsine.... (*sól*) Chê cagne da l'ue 'e sa di sigûr alch.

CÁNDIDE — 'E jé mode siôr parón. Prest j-u tajarai ance iò.

TITUTE — Ben tai-j-u ance tu e cussí 'e sarín duc a la mode (*al mostre il ciâf quasi spelât*). A mi nò mi restarèss altri che di tajâ vie el ciâf par nò viodi, par nò sintí, par nò jessi d'intrich, par nò velenâ-mi el sangh..... Opûr ciapâ la sclope a baletóns e trai fin amen...

CÁNDIDE — (*'e va donge di Titute*) Si sa po'?... cumò che lu nomenarán Podestât.

TITUTE — Tu hâs resón (*la ciape pe' vite stand sintât*) ma se tu tu mi 'ûs un freghenín di ben, dâ-mi almancul tu l'ilusiôn di nò sei in-t-une ciase di maç. 'O sint che a pôch a pôch 'o restarai bessôl; che la me Lúcie mi s-ciampe, che mi toce finzi, finzi simpri parcè chel brigánt di Basandiele nò 'l si inaquarzi dal miò patimént...

CÁNDIDE — E ce vègni-al a fâ ca chel siôr Agnul, quánt che lui al va a Udin?

TITUTE — Ta-l-hai pûr dite... mi toce gloti, gloti, Candidute me, (*la strenz a sè*) consòli-mi tu, benedete....

CÁNDIDE — Ce dísi-al, can-da-toro?...

TITUTE — Nò stâ bandonâ-mi, sies-tu benedete, chel bièl pan di sponge. (*Cándide lu lasce impalât e 'a còr vie*). Cagne da l'ue. — La glòrie, la glòrie, la podestarie; ce tant che mi coste. Dome chê ciargnelone lí 'a vará la virtût di fâ-mi dismenteâ dutis lis amaressis, la bile che mi fasin gloti lis mès fèminis, chês malandretis. (*al sune il campanèl de buteghe*) Cándide, Cándide... (*Cándide 'e torne dentrí*). Va viôt ce che vuelin in buteghe, che mi è vignût fin l'agágn; (*Cándide sençe rispuindi 'e jentre a man drete*) e ca bisugnarâ che mi rimeti in pàs; i afars di famee nissún devi savê-j-u. (*al va a scoltâ donge la puarte*) Mi par la vòs di siôr Mòmololo.... Ca si ciacare di pulítiche parcè a nò pâr vere; al pararèss propriit che vessin voe di nomenâ-mi sul sèrio podestât di Surisins. (*Cándide jentre in scene*)

SCENE QUARTE

Cándide e po' Siôr Mòmololo

CÁNDIDE — (*a siôr Mòmololo che nò 'l vorèss disturbâ siôr Titute*) Nò-l disturbe, nò, ch'al si còmudi; (*a Titute*) 'a l'è siôr Mòmololo. (*Cándide va vie dal fonç*)

TITUTE — La hai-o dite iò?

MÒMOLO — (*jentrând*) Affari de alta politica, sior Tita benedeto, e riservati anca...

TITUTE — (*al si ciale atôr*) Sin-o sòi? Is-al rivât alch par telègrafo?

LA STRIE

Lunari fabricât da so marit

GUIDÓN SALVADI

cu lis fortunis, lis disgrâçis, lis lunaçons, i marciâç, i pronostichs, lis legnadis,
i matrimonis, i ternos al lot, lis fiestis, lis ciochis, lis ricieçis,
lis boletis e dut chel che al suçedarâ

1a-l an 1887

Cividât, tipografie Zuán Fulvio, 1887 (In realtât il lunari, 'ta-i prins ajns,
l'è stampât da la tipografie Fr. Pelarín di Sandenêl)

PREAMBUL ⁽¹⁾

Soi lâ a tombolóns cu lis finançis
e nò mi ciati un boro 'ta-l tacuin;
nò zovin né suspîrs e né lagnançis,
e nò conte sberlâ cuintre il destín.
Ma nò sai par çe sorte malandrete
ch'o hai di finî l'an propri in bolete.

Capisc che lis anadis butin mâl;
jé cressúde la spese e i bêç calâç;
'o capisc che in-té l'ultim carnovâl
chei ch'o vevi in sachete j-u hai fraiâç;
ma cun dut chest nò puêsc propri capî
che la bolete 'e vegni dute a mi.

Bisugnarêss da-bón che par salvâ-mi
qualche sant dismontâss dal paradís;
ma 'te-l vignî dabâss, e in-tè-l ciatâ-mi,
el piardarêss almancul quindis dis;
e iò, se o spieti dome fin domân,
'us zuri, ciârs Furlâns, ch'o mûr di fan.

Dúncie corágio; 'o fâs la muse dure,
e mi met a doprâ chel ch'o hai studiât;
e a ris-cio áncie di fâ brute figure
'o uei tornâ in pôch timp chel ch'o soi stât.
Cussí, par nò finî-le a l'ospedâl,
mi met a lavorâ di canociâl.

'O sai un tant par sent di astronomie,
e mi regòli sul zirâ des stelis;
è cun un freghenin di fantasie
'o podarai contâ-nt brutis e bielis,
fevelânt in furlân su le nature
parçe che mi capis sençe fature.

'O mandî atôr intânt i segretâriis
a fâ sù novitâç e previsionis;
ma antecipâç 'e uelin 'vê i salaris
se nò mi rompin dut el dí i mincións:
'e l'è mássime un tâl, grand, gruêss e grass,
che se nò l'ha i bêç prin nò-l fâs un pass.

(1) 'O hai scrit par fâ-mi capî dai Furlâns e dai Taliâns, e duncie 'o hai scrit come che si fevele
'ta-l miò país, tignint simpri 'te-l ciâf che il furlân l'è un dialèt de lenghe nazional, e che al devi
vê — par chel tant che si pò — lis stessis règulis di... grafie che son buinis da tanc ans par la
lenghe taliane. E 'o lassarai ciacarâ i sapientóns che inventin ogni dí règulis gnovis par nò fâ-si
capî di nissún.

(Evidentementri Guidón al veve presint la polèmiche che qualchi an prime ha vûd lûch sui
giornai locai a proposit de grafie furlane a la quâl parteciparin il prof. Bonín, Checo Biasón
e altris. — *Note da l'editôr*).

Il secónd, ch'al va vie dūr come un pâl,
el devi cori atôr par i país,
cu-l caretín e un brocul di ciavâl,
che'l podará resisti un quindis dis;
e quan-che al crepará, par nò fâ luss
'o vend la caretine e j compri un muss.

Intánt che jo, par compilâ il lunari,
cu-l canociâl mi suarbi in çime al tôr,
un cont, che l'è áncie lui miò segretari,
el mi mange la paje e al fâs il siôr:
chel pipinòt dis di studiâ lis stelis,
co' al smire, dal cafè, lis camarelis.

Ma un bon frutât, ch'el grate áncie il lirón,
cheste volte l'ha fat il sò dovê,
parçè ch'al mi ha contadis in scuindón
novità mai sintudis prin di ué
e prévisions in tante quantitât,
che dute la mê sciéncie han superât.

'E jé la prime: che áncie chist unviâr
plui prest che nò in istât vegnirâ sere
e che si scugnirâ meti il tabâr
par parâ-si dal frêd e da la buere;
e il frêd, al mi disè, sarâ tant ciân
che i polèç al soreli j vegnarân.

Cun dute segreteçe al mi ha contât
che in avrîl 'e varîn qualche sariese;
e che i bieî fantaçûç de la çitât
podarán regalâ con pócie spese
maçetûç ciapâç sù vie pe-s tavieliis,
par lis massâriis e lis camarelis.

Zenâr

Zenâr, miei ciârs Furlâns, l'è capitât
in compagnie de nêf e de la buere;
e pe-s stradis del nestri Çividât
i çitadîns a passin 'a cariere
e ombrenis e ciapieî a tombolón
e svolin jù pa-l puînt del Nadisón.

Jé vignude une buere malandrete
che ha netade parsîñ la me sachete.

lò par miò cont dopo 'vê consultât
di dí e di gnot l'amigo canociâl,
par savê l'andamént del gnûv istât,
e se le anade larâ ben o mâl,
'o hai savût - e sí che l'è un mont vieli, -
che come ogni an al scotará il soreli.

Dopo, sençe bisugne di nissûn,
e dome cu' l'aiût del miò talént,
'o hai podût capî che in-té l'autûn
ognûn al podará jessi content,
parçè che tant il siôr che il contadín
s'a varân ue 'e podarán fâ vin.

Dúncie alegris duc-quânc, che in cheste
gioldarín tant e plui de l'an passât; (anade
e sin iò marcierai cu' la velade
a vendi il miò lunari su-l marciât;
e se nò orês comprâ-lu, folch-mi-trai,
butî a ramengo science e canociâi.

Ma nò larâ cussî: mi viôd za atôr
duc i Furlâns cui beç za preparâç;
mi viôd vignî indenánt il puar e il siôr,
e duc 'e uelin jessi contentâç.
lò hai fate la me part cu-l strolegâ;
e in ogni câs sarâ chel che sarâ.

Dúncie da brâs! La me presentaçión
'o l'hai za fate e chê dei segretaris;
se po' nò 'us comodín dái-mi un milión,
e 'us zuri di nò fâ mai plui lunaris.
Cussî conténç duc-quânc, par mâl che vadi,
nò-l crepará di fan

Guidón Salvadi

I Nûi (ed. 1894)

I nui coventeressin duc i dis
par scuindî i quârc de lune e dei mariç.

Il çil l'è plen di nui e cussî scûr
che la lune nò ha voe di saltâ fûr.

'E vin pantán 'te-l çil, pantán 'te tiare:
un mièç metro di nêf al si prepare.

Fevrâr

Si impegnî lis cuviartis e i tabârs,

lis ciadenis, i orlois e lis padielis,
inzegnîrs, avocâç, mestris, nodârs,
sioris, pûeris, massâriis, camarelis,
duc-quânc 'e si preparin ben o mâl
a gioldî i ultims dîs di carnovâl.

Se al dure anci-mò un poch di chist timp
(d'unfiâr
'o resti in-tâ-l miò jet dut-quânt l'unviâr.

Il Cont, miò segretari, al cor atôr
par preparâ un fiestîn che j fasi onôr.

Balait fantatis, nò fasês peciât:
in carnevâl dut-quânt l'è perdonât.

Par lâ al veglión si còr traviârs la plaçe
e si plante jû il cûl 'ta-l mièç da glaçe.

Març

Lis máscaris son ladis 'ta-l cassón,
e capelîns, veladis e scufetis;
si viodin a lâ atôr in pruçission
tòniis di predis, còtulîs, veletis;
e par dut 'e l'è un gran scampanotâ
e ciantâ litanîis e prediciâ.

Quarésime è vignude e i balarîns
si ciatin disuedâç duc i tacuîns.

'E son doi dîs che vin áncie il soreli,
e la lune in çîl 'e pâr un spielî.

Lait in glésie a sintî il Quaresimâl
par parâ jû i peciâç del carnovâl.

Primavere jé ca cu lis ghirlandis
di maçêç, di garòfui, di violutis;
'e salte pe-i fossâi e pe-s ciarandis,
pe-s montagnis, pe-i prâç, pe-s colinutis,
sparniçânt da-per-dût e jarbe e flôrs
che viestîns la nature a mil colôrs.

Si sint za pa-l Friûl matine e sere
spassizâ il ventesèl di primevere

Avrîl

Cu-mò che l'è vignûd il mès di Avrîl
mârcie la zoventûd sençe tabâr;
il soreli l'è bièl, l'è net il çîl
e plui nò si vise de l'unviâr;
çercin i zovenòç, armâç di rosis,
cu' le gnove stagiôn gnovis morosis.

L'è in-té-l çîl e in-té tiare un tâl splendôr
che áncie in bolete 'o cròd di sedi un siôr.

I ulivs son da la plóie travanâç
ma dal soreli i ûs sarân s-cialdâç.

Rosis, violis, garòfui, gelsomîns
la campagne cuviarzin e i zardîns.

Chel segretari grand e grues e grass
cun chist bièl timp nò-l fâs che cori a spass.

Áncie il cont el va atôr armât di rosis
çimiânt a lis frutis e a li sposis.

Maj

'E sin in Maj; el ciente il rusignûl,
e dute la nature 'e jé un splendôr;
In-té-l çîl nò si ciate nâncie un nûl;
e duc 'e sintin voe di fâ l'amôr;
i fruz che duarmin anci-mò te scune
se nò han la morosute 'e han la lune.

'E spandin lis rosutis mil odôrs
vistint il miò zardín di mil colôrs.

Ciantin di gnot i rusignui e i çuss;
e il dí, za si capísc, ciantin i muss.

La lune 'e lûs tan ben che pâr contente;
pe' forme e pa-l colôr promèt polente.

E tin! e ton! un lamp e une saete;
'e cole une tempieste malandrete.

Jugn

E tin e ton, parsore Mont Majôr

l'è un gran sclopâ di tons e di saetis :
Il Pari Eterno al suede il sborfedôr,
e San Pieri j dá fûch a lis fusetis
e dal çil rebaltâç i nuvolóns
son lí par colâ in tiare a tombolóns.

Se l'ûl durâ chist s-ciafojâç da bon
'o resti dut el di 'te-l Nadisón.

Mos-cis, paveis, furmiis, tavâns, scussóns
dut-quánt il di nus rompin i mincións.

In mániis di ciamese l'è ca **Istât**
clopánt, soflánt, cu-l ciapelón di stran,
cu-i braç a pendolón, dut-quánt sudât,
cu-le so brave ventuline in man ;
e sençe piardi timp a dispoiâ-si
el salte in Nadisón a rinfres-ciâ-si.

Vin vude plóie, cu-mò vin calôr :
il contadín chist an al si fâs siôr.

Lui

Son rivâç da Parigi dis vagóns,
par riparâ-si i vôi, di ociai fumé ;
il soreli l'ha viárt i partelóns,
e mai nò l'ha butât plui fûch di ué ;
e l'è tant s-ciafojâç, jé tante arsüre,
che sta avilide dute la nature.

'E sin in Lui, e ciale çe câs râr !
Il soreli al fâs ciâld plui che di Unviâr.

Il contadín 'a l'è restât contént ;
mai plui tante cucagne di formént.

A un dei miei segretaris, chel plui bon,
il ciâld l'ha discolât dut il lirón.

Balíns, polver, fusil, carnîr, botaçe,
duc preparin : domán si viârç la ciace.

Avòst

'O hai scontrât chel segretari grass
che al leve vie cu' la so sclope in man,

vistît di ciaçadôr, e con un pass
maestôs e tignînd pe' cuarde il ciân.
El mi disè che al veve lui copât
tre o quatri quais che inveçe l'ha comprât.

E pif ! e paf ! si sint a sclopetâ,
ma pôs uçeji si viodin a colâ.

A Cividât i zovîns del bon-tón
in plaçe duc i dis zuein di balón.

El pajerà chist an il contadín
l'afît dome cu-i beç del çinquantín.

Il canociâl l'è mat, o al mi tradisc ;
çe timp che al vei di sedi nò capisc.

Setembar

Diligençis, tranvais e feroviis
s'implenissin di siôrs e di siorutis.
Madame, che ha inventadis malatiis
par lâ a fâ i bagns, come che fasin dutis,
'e torne da Vignésie cun chel luss
che il marît l'ha pajât : bocón di muss !

'A l'è un gran rebaltón 'ta-i eleménç :
il timp l'è saltât fûr dai furniménç.

'O vevi il segretari atôr mandât ;
ma il ciavâl, pe' tempieste, j è crepât.

I nui son ingrumâç 'ta-l firmamént
'o hai paure di un gnûf rebaltamént.

Autún ven indenánt in-t-ún tinâç
tirât da un pâ di bûs inghirlandâç
'e l'ha su-l ciâr vassei, brinciei, botâç
plens di vin e di rosis duc ornâç ;
el ven ciantánt e ucánt vie pe' taviële
e ogni tant j dá dentri a la rebuele.

Chist mès che l'è stât plen di matetât
sençe fa granc malâns 'e l'è passât.

Otubar

Il soreli al risplénd, il çil l'è net,

la campagne 'e jé dute in aligrie;
il contadin el met di-zá a sotèt
il racòlt che l'è il frut de so fadie;
la lodulute in cìl ciente d'amôr
fin che si sint sujât il glutidôr.

Preparait, contadîns, sbrinçîs e zeis:
sore lis vîç 'e son plui raps che fueis.

Iò ciâmps nò-nd-hai, e pûr chist an uei lâ
pa-i ronchs dei miei amîs a vendemâ.

L'amigo Bepo, segretari, in buse
el tire il çuss, tignînt la sclope a muse.

Us-gnòt al plûv, ma iò metarèss pen
che par domán sarâ vignût serén.

Nò varèss mai crodût che îr di sere
vess vût di saltâ fûr dute chê buere.

Novembar

'O sint di-zá in-te-i uèss filtrâ il garbîn
e 'o sint za voe di meti sù il tabâr;
ma po' cun doi moróns e un got di vin
'o mi tiri daûr del togolâr,
e intânt che fûr al svinte e che al nevee
par un trono nò doi la me ciadree.

Chist an al si prepare un bon marciât;
San Martín cu-l bièl timp l'è capitât.

L'è incoronât di nui dut Mont Majôr;
Barbe Giove implinîsc il sborfedôr.

La lune prin si mostre, po' si scuînd;
'e-n viodarín di bielîs cun chist vint.

Tante buere ha menât le lune plene,
che par-aer mi ha puartade áncie l'ombrene.

Dicembar

Son coladis lis fueis, l'è il cìl nulât,
la campagne jè zale e ingrisgnide;
parsín il Nadisón 'e l'è inglaçât,
e la biele stagión 'e jé finide.
Il segretari grass 'e l'ha i polèç,
e il cont el dîs che i duelin duc i uèss.

Oh çe nêf! oh çe buere! oh çe garbîn!
par s-cialdâ-si no l'è che un got di vin.

Par viodi che 'l nevee, che 'l folch-mi-trai,
nò coventin né lenç né canociai.

Unviâr ven indenánt intabarât,
'ta-l so capòt di nêf e di pantân,
cu-la pipute in bòcie e il nâs glaçât
e cu-l soflèt e il sborfedôr in man;
e soflânt e sborfânt ingrisgnît,
in çime a Mont Majôr al plante il nît.

Unviâr al nus inglaçe áncie a sotèt;
l'è mior restâ du-quánt il di in-té-l jèt.

Prin che il lunari lá di Fúlvio al vadi,
'us áugure un bon an

Guidón Salvadi

LA STRIE par l'an 1888

PREAMBUL

Parçe-mo il cìl, che prim l'ere in-nulât,
is-al cumò plui risplendént di un spieli?
Parçe si is-al in bote disglaçât

e s-ciâldi-el miôr di prim áncie il soreli?
Parçe da la montagna a la planure
si mèt-ie dute in fieste la nature?

I çitadîns che, come 'te l'unviâr,
corevin pe' çitât ingrisigniç,
parçè bútin-o jú cumò il tabâr,
lant atôr plui alegris e plui vîvs?
Parçè dute la int mi ciáli-e tant
se mæstôs voi pe' çitât zirând?

Parçè suçédi-e tante confusiôn
'te-s osteriis, 'tè-s plaçis, 'ta-l cafè?
Parçè chist dîsin-o duc: - Ca ven il bon!
Çe vere gran zornade che jé ué!
Parçè chist tañanai straordenari? -
'E l'è dut-quánt efièt del miò lunari.

E jo soi ca, Furláns, sençe dovê
dî-us il miò non e chel dai segretáriis:
a chest'ore, mi pâ, dovês savê
cui che son chei che fasin i lunáriis;
come par l'an passât o sin in sis,
ma çinch nò mi lavorin che cu-i pis.

La me fêmine, **Strie** dí gran talént,
il cont e il sunadôr di violón,
chel altri lunch e il zovín cûr contént,
che nò mi fasin propri nuje di bon,
e jo che mi sfadii, finisc la liste
cun dute l'astronòmiche proviste.

E 'o devi propri dî-lu clâr e net:
di ciapâ lis fis-ciadis nò hai pore
dopo il suçèss de l'an otantesièt,
e ancimò speri di fâ miei la vore:
se cu-l fâ si impare, e se 'o hai falât,
di rimediâ chist an puèss iessi in grât.

Cussí siôr Fúlvio, pe' seconde volte
el met in vore la tipografie.
E nò ocòr dî che l'ha zaromai ciolte
une máchine gnove apuèst pe' **Strie**,
di maniere che duc in chist momént
'e lavorin pe-l grand avenimént.

Chist an po' hai deçidût di dedicâ
lis mès fadiis propri ai çitadîns;
cussí mi soi mitût a studiâ
il cafè frequentât dai moscardîns,
par fâ cognosci a la posteritât
chist nobil lûch, decoro de çitât.

Cussí in chel gran cafè domènie vot
lei par podê un'orute parâ vie,
e sicome che l'ere bielzá gnot
dei pendolóns ciatai la compagnie,
che, duc plantâç sui nòbii emisferos
struciavin gabinèç e ministeros.

Un po', che i trente 'e l'ha di pôch passâç,
ma che la int maligne j dîs "*il vècio*,"
el leve vie sberlânt propri sul nâs
a *quatri* che zueavin di cotècio:
"*Xe una gran massa de âseni e de mati*
ministri, senatori e deputati „

E un cont j rispuindeve: 'E l'ha resón!
Bisugnarèss duc-quânc 't-un colp ciapâ-j-u
e mèti-j-u a fâ politiche in presón! „
E un brâv dotôr di colp: "Presón? Piciâ-j-u!
"Jo 'o dîs „ salte sú *un tal* da la ciadree,
"che si stave plui ben sot Menabree! „¹⁾

E pif! e paf! e botis ca di ca,
e pif! e paf! trussadis e sburtóns,
e dai! remene! e pachis lá di lá
ti butin jú puar Crispi a tombolóns;
'e fasin a pidadis i altris cori,
oressin 'ta-l guviâr nome Marchiori ²⁾

Si jeve sú un simpaticón di siôr ³⁾
che al dîs che la tempieste i class 'e scusce,
a fevelâ sul nazionâl lavôr
su la borse françese e su la russe,
e passânt sore dutis chês questionis,
el ven a rasonâ des Convençions ⁴⁾

"Par mèti-us un esempli sot il nâs
- el dîs - de infâmie a la quâl son rivadis
"chês maledetis gnovis soçietâs
"us dîs che fra lis leç cumò inventadis
"a-nd-è une par tignû sul capitâl
"il doi par çent di calo naturâl.

"Per esempli mi vevin di rivâ

1) Presidént dai Consei dai ministros dal
27 Otubar 1867 al 31 Dicembar 1869.

2) Deputât dal second colégio di Udin par
diviarsis legislaturis, plui tard Sotsegretari di Stât.

3) Siôr Zorz Pículi. 'Te edición 1894: Siôr
Zorz, dei plui famôs tra i bombardóns.

4) Lis famosis convençions feroviáriis che
ocuparin par un pièç il Parlamént.

“cent spléndidis ciadreis di legn stuárt;
“viodínt novantevòt a capitâ
“’o voi a la staciòn par fâ rapuárt
“e mi disin: Nò-l viòt, siôr basoâl,
“il doi par çent di calo naturâl?”¹⁾

E intánt cun gran sciéncie ognún discôr
di finanzis, di borsis, di piture,
di leç, di soçialismo, di lavôr,
di polítiche, di art, di agriculture,
di càlculi matematichs, di scritòrs,
di leterâç, di miedis, di scultòrs.

Entrin lis companniis dei diis di fieste
dutis in-t-une bale buzarone,
e come che volessin fâ di-pueste
’e fasin montâ in fúrie la parone,
che, in chel bordèl, con pietòs suspìrs,
di-bánd ’e spere ’ta-i carabinieri.

Ma ’o viòd che te-l preambul hai slun-
la descriçión di plui dal neçessari, (giât
però, se sês di buine volontât
lejeit lis lunaçions vie pa-l lunari,
là ch’o hai copiadis cui miei puars colòrs
lis figuris dei altris aventòrs.

E cumò døs peráulis su l’anade,
’e lis regali propi ai contadíns;
mi pâr che la citât ’o hai contentade
ilustránd il cafè dai moscardíns.
Cumò spietait che ’o disi se cucagne
o ciaristie varín in-té campagne.

Bon principi de l’an

Amís, lassait che, prim di scomençâ
a meti a puèst e mès e setemanis,
un bon principi d’an puedi augurâ
a frutis, sposis, vèdulis, vedranis:
cussí in chest ninín di puèst ch’al vançe
puedi mostrâ al biel sess ch’o hai creançe.

Zenâr

Çe blanch ch’a l’è il linçul che al si di-
da Mont Majôr per dute la planure; (sténd
un gran silençi, un grand avilimént
al ten ingrisignide la nature;

Prime di dut soi propri disperât
di di-us che nò varès bièl çinquantín;
per-altri áncie plui bon de l’an passât
’te l’an otantevòt varès il vin,
e persin de la Tòr in mièç de gràve
’e cressarán saròss, formént e blave.

’E varín masse ploje ’te l’autún
e in dut il Lui un fulmín di soreli;
cussí par dut l’istât propri nissún
podará dí che al sei diventât vieli;
nêv in unviâr, e glaçe e ploje e buere,
e tant scûr che a misdí parará sere.

Però dut in complèss nò-l sará mâl,
ma nò us consei che duc i bêt che vês
j-u mangiais in-tá-l prossim carnevâl,
sebén che su la blave ’a-n ciaparès
tanc che, par nò savè dulà logâ-j-u,
’e podarès a cui che ha fan donâ-j-u.²⁾

Par intánt, ’us saludi. ’O vês capît
che cheste part ’e jé finide.
Cumò il miò ciâv ’a l’è un pocût sturnît,
e ’o mi sint propri sute la pìvide.
In seguit, se nò ’us hai rot i mincions,
’us clamarai a lei lis lunaçions.

1) Ed. 1894: che ’n mancín døs par calo naturâl.

2) Fin d’alòre al si manifestave lu spìrit
altruistich dal Podreche che plui tard al fo
deputât dal partìt socialiste.

jo pensi: In fin dei conç hai fûch e pan
ma qualchi puar di fûr al mûr di fan¹⁾

Viòd nome nâs là atôr par Cividât;
il rest ’a l’è dut-quánt intapossât.

Zujadôr vècio, intánt che fûr sofflete
siôr Coletto²⁾ l’ha dât un dividete.

L’è mièç metro dí nêv ’ta-l mièç de plaçe;
la gote a un monsignôr sul nâs si glaçe.

1) L’aparisc il futûr difensôr dal proletariât.
’Te ediciòn 1894 son ches-c altris doi viârs in plui:
lò ’o sint in-tá-l miò cûr cresci l’afièt
par duc chei che ’ta-l mond nò han né pan né tet.

2) Nicolò de Pollis pari dal avocât Toni muárt
ta-l Novembar 1928.

Viôd simpri a cori cu-i cialdîrs Giovane,
sebén che jé glaçade la fontane.

Fevrâr

Sot i archs del puint la buere sivilând,
'e spache i flochs di nêv jú dai ramâç;
il Nadisón al passe sbrundulând,
e pa-l cuârp jo mi sint i sgrisulâç;
'e sune la ciampane dal convênt,
cun-t-une lúngie note di lamént.

Cun dut che al tire un mostro di garbín,
il cont ¹⁾ al còr atòr pa-l so festín.

Saltait fantatis! chist l'è l'ultim bâl;
ancimò pôch, finîsc il Carnevâl.

Nò valin lis vedranis par l'amôr,
'e corin a vaî dal confessôr.

Un conseîr mi dîs che nò l'è scûr,
che vin la lune... e paf cu-l nâs 'ta-l mûr.

Març

Ir, sore di un rivâl, in miêç de jarbute
tímide e sençe il so zentîl colôr,
hai ciatade une pûare vîolute
sençe la fuarçe di mandâ il so odôr;
chê vîole zentîl jé la stafete
de primevere alegre e benedete.

Un tâl di Borgh di Puint ²⁾ l'entre in ociâi
par lei da çime a fonç duc i giornâi.

Si prepare domán biele zornade,
ma il timp farâ ancî-mò qualchi matade.

Che il çil al stedi innulât fintânt che l'ûl,
'e l'è simpri ridént il miò Friûl.

Peciât che qualchidún co' al met sù pançe
el ueli dâ-si un pôch masse importance.

1) Si cròd che al sei il cont Guljelmo Pup,
opûr il cont Bepo di Caporiach.

2) Il nobil Bepi de Pacián

Avrîl

Mi soi dismòt chiste matine 'as sièt
sintînd a piulâ dúngie i balcóns;
'o salti fûr in-bote dal miò jet
'o tirî su lis scârpis e i bragóns,
'o viarç i scûrs: il çil l'è come un spîeli
e la çisile 'e ciente in plen soreli.

Si-po'l.. mal.. ciò!.. la Pasche 'e jé passade!
e sençe un teremòt ¹⁾ la vin s-ciampade.

O çe ligrie in-te çitât e in vile!
si sint che jé tornade la çisile.

Primevere

Primevere chist an si fâs spietâ,
'e orèss cori; 'e si ferme, 'e sta indaûr;
lis vîolis nò pensin di spontâ.
E il çil, dut innulât, l'è simpri scûr.
Anci-mò i çitadîns, dopo gustâ,
nome ben taponâç 'e saltin fûr:
e apene che in Cafè puedin rivâ,
si sintin e nò jescin plui sigûr.

Un ciâr amigo, un vero galandín,
sençe badâ a nissún, sore un sofâ,
il cafè al si sorbîsc o il bicierín;
e intânt al si sfadîe a studiâ
per fâ un elegantissim figurín,
o par ciatâ un mût gnûv di saludâ.

L'è sfolmenât in-t-ún momènt il nûl
e al risplénd il soreli su-l Friûl.

Maj

O primûlis, o rosis di montagne,
o garòfui di bosch, o gelsomîns,
vîolis che çimiais vie pe' campagne,
i ciâmps par vô diventin tanc zardîns!

1) Il teremòt l'è sucedût invece il dí di
Pasche dal 1895 il 14 Avrîl a 23114 cun epicen-
tro a Lubiane.

Ma il vert di primevere al vinç dut-quánt
slargian-si grandîos e trionfânt.

'E sin in Maj; nissûn la crodarâ,
che a Mont Majôr al torni a neveâ.

Un miedi in cane ¹⁾ al si farèss in quatri
par mostrâ a duc la curve dal Teatri.

Nò nome in Maj, ma par dut l'an un truss
che jò cognòsc, el va ciantând di muss.

Che vadi al bosch chê zòvine che ûl
sintî a ciantâ di gnot il rusignûl.

Jugn

Soi su la çime del Fortin. ²⁾ Denânt
incuintri al mâr, si slârgie la planure;
e lis picûlis vilis blanchizând
dan vite a chel gran quadri di nature.
Atôr i monç come fedei soldâç
cuintri duc i stranîrs 'e stan plantâç.

Come ué, za sîs ans, 'e l'ha lassât
il mond il prin eroe de umanitât. ³⁾

Oh il verd, miei ciârs Furlâns, l'è un bièl
(colôr,
ma al verd nò-l ûl restâ né il puar né il siôr.

Çe timp indiaulât: îr l'ere bièl,
e ué la buere 'e puarte vie il ciapièl.

Istât

El côr vie il Nadisón bièl e çelèst,
e il çil l'è sençe nûl splendént e net;
la planure d'un zâl dorât si vièst
e in Cafè si prepare za il sorbèt.

1) Il dotôr Secondo Fane simpri in cane
e veladôn. Il popul al veve fat cheste strofute:
*Che cana che ga el dottor Fana - la xe alta
quindese piani - se la casca la fa gran malani -
la rovina mezo Milan.*

2) Culine a setentrion di Cividât alte 218 m.

3) Garibaldi muar a Caprere il 2 di Jugn 1882.

I diletânç 'e studin al plui prest
músiche gnove par formâ il quintèt
par fâ lis serenadis cun dut sest,
che lis frutis 'e scòltin stant 'ta-l jet.

Ancie 'te sale del biliârd al rive,
fin dúngie doi che duarmin, il soreli ¹⁾
e j-u dismôv in bot cu le lûs vive.

- Camerir! - al dîs un - siare chês quartis!
- L'è ca chel ciân di istât, - dîs il plui vieli -
nò si pò plui durmî né zueâ di ciartis -

A sintâ-si scomençin propri uè
i zovins sot la loze dal Cafè.

Lui

Al fúlmine il soreli la montagne,
e nò si viôd a movi nâncie un stech;
pâr che sedi brusade la campagne,
e i uçelûç nò viarzin nâncie il bech: ²⁾
la pûare taviele 'e jé impiade,
e dut il mond sot il soreli al sflade.

A viodi se sul domo il tet l'è bon
i zujadôrs 'e mandin sù il balón.
E il guviâr sençe spindi, 'a l'è contént
di conservâ in chel mûd il monumént.
Ançi cumò in Itâlie si propón
par ogni monumént il so balón.

O si scugne stâ in mániis di ciamese,
o croç dut-quánt il dî 'te-l Gorgh di Lese. ³⁾

El tire tant di voi, e l'ha bon ciâv,
ma chel che l'è italiân lui lu crôd sclâv. ⁴⁾

Avòst

Jescin pa-i ciâmps a vore in compagnie,
vecios, vecis, fantâç e fantaçinis;

1) Pieri Pupis, defònt.

2) Edic. 1894 e tegnin viârt.

3) Dula che il Riul Lese, che al scôr a seten-
triôn di Carârie, al confluisc 'ta-l Nadisón.

4) L'avocat Carlo Podreche autôr di "*Slavia
Italiana*".

e dei ciânç va corínd vie la ligrie
pe-i prâç, pe-i bosch, pe-s monç e pe-s co-
L'è viçin il racòlt, Furláns, e cheste (linis.
pe-l contadín jé la plui bieles fieste.

Chist an balin pe-s ságris contadinis,
sioris, artistis, púaris, contessinis.

'E finirín, se lin cussí in-denánt
a nasci, a vivi, e áncie a murí balánt.

'E va in scene al teatrín de birerie
une straordenárie compagnie.

I bogns çivaldêls che han creançe
di fis-ciâ i comichs ciâns nò han l'usançe.

Setembar

O çe bièl viodi sú par lis colinis
in cime ai árbui pomis plui che fueis!
O çe bièl viodi chestis contadinis
zirâ ciantánd cun sore il ciâv i zeis!
Ma plui bièl viodi preparâ tináč,
e turclis, botis, sbrinçis e botáč.

Nò ocôr che 'o disi nuje de campagne;
varín chist an in dut vere cucagne.

Il mestri ¹⁾ 'e l'ha cucadis lis pernis
e nd-ha maçadis quindis in tre dis.

Butade sul sofá, un'autoritât
'e mèdite pe-l ben di Çividât.

Aufún

CIAÇE A MOIMÀNS

'O sint a sclopetâ par ogni bande,
viòd pronç fusii, balíns, pulver e stope,
e di Gigi, postât 't-une ciarande
'o viòd sore i ramáč nome la grope.

Si jeve sú une quaje gruesse e grande
come une bote, e lá-di-lá une trope

1) Si alûd al mestri Durlí, vivènt.

di quajúc, e ta-l prât, come in ghirlande
'e stan i ciaçadôrs armâç di sclope.

E pinf! e ponf! e paf! çe businôr!
Si sint a trai, ma nò si viòd maçâ;
dopo tirât lis quais 'e svolín miôr.

Ma i ciaçadôrs, dopo tant lavorâ
'e san ben fâ-j-gi al siôr cont Bepo ¹⁾ onôr
'e dute la lôr strage 'e jé a gustâ.

Leve il dotôr pöete ²⁾ par Manzân,
e la ciavale blâncie j ha ciòlt la man.

Otubar

Su Furláns! Olín gioldi la ligrie,
intánt che par cumò zovins 'o sin;
sunerá áncie par nò l'Avemarie,
quând che muârç e sot tiere nò sarín.
Cussì pe-i çiams 'e ciantin duc di cûr:
jé lontane la muárt, ma il vin madûr.

'E l'ha zurât un tâl sore il biliárd
che pluitòst di zujâ l'ûl restâ muárt.
E pûr al zuee ancimò, ma l'ha la lune:
— Pe-i zo...gadori no ghe xe fortuna. —

Cumò gioldín pûr l'ue, che gioldarín
in sèguît áncie qualchi got di vin.

Un inznîr al met il veladón ³⁾
par mostrâ ai furistîrs ogni ciantón.

Novembar

Un dotôr di gran génio, e gran siorón,
secónd che disin duc, al còr atôr
puartan-si sot il braç chel tâl bastón
co-l quâl l'ha fat za tîmp un bièl lavôr;
e ca in Cafè l'è simpri indafarât
a ingrumâ su i petèç di Çividât.

'O viòd un zornaliste ⁴⁾ çitadín
che ancimò la pretínd di moscardín.

1) Il cont Bepo Nordis.

2) Il dotôr Zaneto Dorigo.

3) Il cont inznîr Mârçio de Portis.

4) Meni Indri.

Un nodâr ¹⁾ di San Pieri spiritôs,
cu-l contâ balis l'ha piardût la vôs.

In-té-l scûr generâl al fâs ligrie
l'unich ferâl de prime speçiarie.

Un cavalir di merit e un perît
la çentésime brîscule 'e han finît.

Decembar

El busine a levânt, nêv a ponênt,
buere par ogni bande, glaçe in tiare.
Un siôr ²⁾ che 'l stâ a la Cele in chist
(momênt
l'entre in Cafè, e si viôd che l'ha la smare,
- Per Crist! - al sberle - al mancûl ca l'è sut,
l'è timp di scomençâ il solit zirût.

Il nestri segretari ³⁾, un fureghîn,
nò-l'è bon di stâ fêr un momentîn.

Un nobil ⁴⁾ in ociâi l'ha il veladôn
par quând che il vescul torne a fâ funciôn.

Par meti sù il vistît teritoriâl
spere qualchi tenênt 't-un funerâl.

Unviâr

A Çividât, 'o dis la veretât,
si sta ben squasi in dutis lis stagiôn,
buinis aghis, bieî monç cîl mai nulât
citadîns che son veros compagnóns.

Ma il brut l'è quând l'unviâr da disperât
si bute jù dai monç a tombolóns
cun nêv, buere e garbîn, che pe' citât
fasin bataje mostre in-te-i ciantóns.

E San Bartolomeo, qualchidûn pâr,
co' al zire nûd e crûd cu-l sôl ciapiêl
çerciând un quintinût e un fogolâr.

E il vêr a çiarç nò-j passerâ pa-l cuêl
ma il fat l'è che al Cafè si tae il tabâr,
e che fûr i usurârs giavin la piêl.

Capiterâ chel tâl dal ciapelôn, ¹⁾
a fâ par Çividât il talentôn,
crodin-si cui-sa-çè, cun chês sôs áriis,
par jessi bon di stampâ sù lunarîs.

Per finî-le

E cumò mi displâs, ma sin al fin
de lis mês ciacaradis su-l Cafè;
e speri ch'è se 'o hai vûd masse murbîn
nò orês propri ciapâ-si-le cun me,
parçè che in fin dei conç soi stât sinçêr,
e nò hai dit nuje che nò-l sedi vêr.

Ma mi displasarêss se qualchidûn
pensâss che nò hai afiêt pa-l miò paîs;
chest, soi sigûr, nò lu dirâ nissûn
che nò-l vedi la coçe lá dei pîs;
jo pûr 'o sint amôr par Çividât,
lá ch'ò hai passade la me prime età.

E dopo-dût in cheste çircostanze
'o mi soi contentât di di del ben,
ma lis pioris 'vin fat duc abastanze,
e cun çiarç tai l'è timp di fâ da-sén;
jo hai dit alch fevelând sore l'unviâr,
e di sei stât trop bon áncie mi pâr.

Del rest, 'o devi di-lu cun plasé,
si ciatin des personis di riguârd
fra i aventôrs del nestri gran Cafè,
áncie se cu-l progrès son in ritârd;
e áncie jo fra chei tâi che hai ritratâç
hai dei amis sinçêrs e rispetâç.

Dúncie si 'vin capît, e 'us sarai grât
se crodarês che dut chel pôch che 'o fâs
'e l'è nome pe-l ben di Çividât;
se po' nò lu crodês nò-l farâ câs;
parçè che jo l'istêss olarai ben
al miò paîs, e chest lu dis da-sén.

E viveit sans. Intânt par mâl che vadi
'us áugure bon an

Guidón Salvadi

1) Dotôr Barcelli za nodâr a S. Pieri.

2) Rugero Morgánt.

3) Tite Brusín.

4) Cont Bepo Nordis.

1) L'autôr de-l Lunari.

LA STRIE par l'an 1889

PREAMBUL

Miei ciárs Furláns, soi ca pe' tiarçe volte e simpri compagnât da la me Strie, parçè che se par fêmine l'hai ciolte nò puèsc nâncie se 'o uei mandâ-le vie; del rest se âncie mi fâs qualchi estrisín, 'o ciati il mût di fâ-j passâ il murbín.

Je po', che qualchi volte 'e ha de l'inçén, 'e ha ulût meti doi títui al lunari, e po' mi ha fat capí che par fâ ben di dá-j-gi un gnûv aspièt l'è necessari, fin che, cu-l dâ-j, rebati e tornâ a dâ-j 'vin decidût di fâ... chel che 'us dirai.

Prin di dut un lunari pitinín che al si clami *la Strie di campagne*, che al sedi propri fat pa-l contadín che al vîv tant in planure che in montagne; su-n chel l'agricoltôr al ciatará duc i conseis che j puedin comodâ.

Dopo un lunari fat pa-i çitadíns, che al si 'vei di clamâ *Strie di çitât*, e chest culí lu vend ai moscardíns che han voje di savê ogni novitât; e in chest farai qualchi petegolêç sençe ofindi nissún 'ta-i siei interèss.

In secônd lûgh, di-zá che 'o hai viodût che l'an passât 'vin vût un gran suçêss d'acordo cu la Strie hai decidût di slargiâ il miò lunari plui che 'o puèss, e cussí 'o speri, se il Signôr 'a l'ûl, di fâ cognosci un pòch dut il Friûl.

Udin, Glemone, Palme e Pordenón, Tulmièç e Sandenêl e Latisane e Codroip e San Pieri e Monfalcón e Guriçe, che jé za çitât furlâne, e Çividât che za nò si discôr, varán pa-l miò lunari un gnûv splendôr.

Ogni an fevelarai dei moviménç e dei progrêss di cheste o chê çitât, ilustrând i palâç, i monuménç e cussí vie ogni altre raritât; e vie par i país ritraterai i tipos plui curiôs e originai.

Ma par fâ chest ocorin carantâns, parçè che âncie fasínd economie i bêç, ta-i viâç, 'e svolin fûr des mans, e land a pîd, o a muss, o in ferovie si han simpri mil cagneris di pajâ a olê sedi tratâç come che va.

'E capirês che la me dignitât nò ûl savént di domandâ-j-gi aiût né al guviâr, né al común di Çividât, tant plui che 'o crôd che al sarêss timp (piardût, ma sore-dût parçè che, folch-mi-trai, nò vuei parón nissún, nâncie se 'l vai.

Ma par combati cun efièt e onôr par i interèss del nestri bièl Friûl, bisugne ch'al mi judi il puar e il siôr ognún secônd che al pò e secônd che 'a l'ûl e par fâ chest il puar ch'al meti man a la borse e che al giavi un carantán.

Cussí cu-i carantâns jo podarai lâ in zîr a visitâ duc i país in ferovie, cu-l muss, o cu-l tranvai che a Sandenêl 'e metin sú in ches-c dís; cussí duc-quânc podarân 'vê il lunari, e jo nò manciarai del necessari.

Cumò po' la me prædicie jé finide e 'o speri che la fuee varês mangiade; spietait che 'o bagni un fregul la piveide, e po' mi torni a meti in ciarezade fevelând dei afârs dei contadíns, sençe dismenteâ-mi i çitadíns.

Nò fâs pronostichs

'O viòd che il contadín al stuárç il nâs
parçè che in-té-l preambul nò feveli
dei pronostichs che fasin al sò câs
regolâç da la lune e dal soreli.

Ma lui che al sa che jo nò hai matetâç,
sebén che in fin dei conç nò soi un vieli,
al capirâ che se sul prim 'o tâs
hai des buinis rasóns in-té-l cerneli.

E di fat 'o hai pensât, par cambiâ usan-
di meti il bon 'te l'ultim del lunari, (çe,
lassând ta-l prim la fare che mi vançe.

Cussí, sençe dâ fûr la me sapiençe
dute t-un colp, a dâ-le 'o mi prepari
di man in man che ven, cu le paçiençe.

Zenâr

Come ogni an
prime di meti a man
i câs che nus suçederán
per il debit di bon cortesán
âuguri a duc un bon prinçipi d'an.

Zenâr ven indevánt ingrizignît
cu-le ponte del nâs rosse e gotânt,
involuçât 'te nêv da ciâf a pîd,
mungulând e soflând e sivilând;
e jo 'te luminârie intabarât
'o voi cialând chist timp indiaulât.

La lune di mîl (ed. 1894)

Cumò ¹⁾ jé la stagiôn del maridâ-si,
parçè che duc 'e han voje di s-cialdâ-si;
e la lune de mîl e fâs fortune,
ma finide la mîl reste, la lune.

'O viòd zirâ sú e jú dutis lis seris
ciârs e ciarúç par implinî glaçeris.

A Sandenêl varín tre dîs merciât;
jo garantisc afârs in quantitât.

Çe gust, cun chiste nêv e chiste buere,
lâ in ferovie pensând a la coriere.

1) Ediç. 1894: L'unviâr.

Cián di Fevrâr! Al prometeve ben
ma inveçe nò-l ha ulût tignî l'impègn.
Ves-o sintût çe náinis? A Tulmièç
l'ha neveât par plui di un metro e mièç.

Fevrâr

Fevrâr l'è simpri il mès plui caluniât,
e chiste volte po' nò-l'è birbânt;
plui nò-l nevee, il garbín l'è calât,
e il soreli al ven fûr di tant in tant.
'O hai propri gust; puar fevrarût,
nò ti dirán duc-quânc: l'è piès di dut.

Il frêd áncie a Guriçe al fâs maláns;
ma nò-l distude i fuchs dei cûrs taliáns.

A San Zôrs e a Marán 'ta-i paludíns
'e son rivâç a sdrume i mazuríns.

Son za vincedoi ans, Pieri Zorût
il nestri poete, l'ha lassâd il mond;
Furláns! tigniit a ment che dopo lui
no podarín mai plui 'vê-nt un secônd.

Març

Nò si sintis-o cori jú pe' vite
il prim cialdût che mene primevere?
Sú pa-i stechs des ciarandis la favite
'e salte ciantuçând matine e sere.
Ancimò un mès, e dopo il rusignûl
a-l jemplirá di ciânc dut il Friûl.

Un balarin (ed. 1894)

'E balin di ca - 'e balin di là,
'e balin di sú - 'e balin di jú;
'e balin i puers - 'e balin i siôrs,
'e balin i predis - i muss, i dotôrs;
ma chel che plui bale - e che nò-l la fale
'e l'è parón Tite ¹⁾ - che l'è simpri in bale.

'E han balât al Minerve e da Çechín
e in domo van pajând cumò il murbín.

1) Tite Beline parón dal Cafè prinçipâl.

Is-al ciáld, is-al frêd? nò si capísc
mi pâr che al sedi propri un timp pustîç.

Chei di San Vît si lagnin se 'o met ploje,
culá l'è un ciáld che 'l fâs la bieie voje;
se culi al plûv, e se lá vie l'è sut,
uèlin-o mò che 'o viodi da-per-dût?

La nature si mude di colôr
e in campagne si torne a fâ l'amôr.

Chist an in Mai vin vût dos lunis gnovis,
e l'últime robade al mès di Lui; ¹⁾
e ch'est fin al doimîlduzinte e quatri
'o soi sigûr ²⁾ che nò-l sucêd mai plui.

Cialait mò, ciárs Furláns, çe diference
che fra me e la nature 'o hai ciatade:
in çil ocôr tant timp par 'vê dôs lunis,
e jo 'o-n ciapi dôs-tre 't-une zornade.

Avrîl

'O voi sul mont Cianín par dâ un'ociade
a dut-quánt il Friûl in-t-une volte:
stait alegri, Furláns! jé preparade
par duc une bielissime racolte;
co' si scomence in ben la primavera
si viôd che il timp nò-l ûl mudâ bandiere.

Un siorón mi diseve ch'ê altre di
che l'è simpri in bolete un leterât.
J'hai rispuindût: di-fât si viôd di li
che siôr e muss tu tu sês simpri stât.

'E svole pe' çitât 'e svole in vile;
Furláns! 'e jé tornade la sisile.

A Guriçe varín famosis corsis;
preparái-si a svuedâ tacuíns e borsis.
Coreit lá-vie duc-quânc, patriôç furláns
a fâ fieste a chei ciárs fradis taliáns.

Primavere

Une volte e cu-mò (Ed. 1894)

Per tant che 'o fasi e 'o volti il canociâl
nò viôd a comparî la primavera.

1) Ne l'edic. 1894: Chist an in març.... e
colpe lôr l'è stât tant batibui.

2) 'O sin sigûrs.

Nome pa-i tims passâç
ciantavin ju poèç matine e sere: ¹⁾

*Il canto pastorai
la luna e l'usignol
e qualche altro animal
che per i verdi campi va bessol:
il sereno del cielo
il zèfiro che tira,
mentre lontan sospira
il bronzo suon di qualche banduçielo,
il qual matina e sera
invita il contadino a la preghiera.
E i fiori spampanati
i rivi disglacati,
gli uccelli innamorati
i mussi imboreçati
che dan dentro a cantar da disperati,
il pastôr, la pastorella
che vanno ucando via per la taviella,
l'aria serena e pura,
la terra in floritura
e tutta messa a nuovo la natura.*

Cussí la Primevere
si cròd che in tims passâç 'e sedi stade
une stagiôn beade;
che sedi propri vere,
o che i poèç ²⁾ la vebin inventade?
Jo, mò, nò sai çe di,
ma 'o viôd ³⁾ che ogni di
quând che dovarèss sei bieie stagiôn
qualchi lamp, qualchi ton
si sint cùli e culá;
o si viôd a sglavinâ
e la buere a soflâ,
i nui a spaçisâ,
la tempieste a colâ,
il soreli a zirâ
sençe podê s-cialdâ,
e persín va-e-nò-vâ
glace, nêv e zilugne a capitâ.
Nò viôd insume il timp ch'al sta di miêç
fra l'inviâr e l'istât,
ma un salt indialvôlât ⁴⁾
dal gran frêd al gran ciáld sençe intermiêç.

1) Edic. 1894 Di lâudâ si veve la maniere.

2) Edic. 1894 O i poetis la vedin - 3) 'O ciati

4) Indialvât

Dúncie, se il timp fâs chestis matetâç,
in cheste confusiôn universâl,
nò-l'è po' di fâ câs
se 'o piârd il ciâv jo cu-l miò canociâl.

I nestris vècios disin che in Avrîl
nò bisugne giavâ-si nâncie un fil.

Corpo di bio! cumò si viârç il cûr;
mi pâr sin îr di sedi stât a scûr.
Se nò foss altri, cumò 'vin soreli
e si fâs 'cunumie di legns e ueli.

Maj

O benedèt il mès di Maj che 'l puarte
rosis, violis, garòfui e sclapóns!
E par ches si dîs simpri che la viarte
jé propri la plui legre des stagións:
peciât che in mièç ai flôrs e ai ucelûç,
culî e culâ si sinti a zornâ i muss.

Se il timp al si mantén cussî serén,
la campagne, sperín, si met in ben.

Ce ciâld (ed. 1894)

Si ha pore che cu-l ciâld de la stagiôn
si disglaciñ lis múmiis di Vençón.

Il timp al nus dá sù qualchi bugade;
domán, mi pâr, sarâ brute zornade.

Lune gnove: Di gnot a fâ l'amòr
si pò tirâ sù qualchi rafredòr.

Jugn

Il nestri bièl Friûl a-tôr a-tôr
l'è contornât di monç e di colinis;
lassú la nèv 'e mande un blanch splendôr
ca lusin lis planuris verdulinis;
e sot al gran celèst del firmamént
si indorin lis campagnis di formént.

Chei Furlâns che non han dismenteât
chel, che il nestri país l'ha liberât,
'e san che il nestri Garibaldi ai doi
di Jugn par simpri l'ha siarâç i vôi.

Il balòn proibît (Ed. 1894)

In plaçe di balón uelin zuiâ
ma 'o hai sintût che j-u han di proçessâ;
sarèss biele, di bio! che a ogni balón
si 'vess di fâ-j-gi une contravenciôn!

Pordenón l'è il país de lis risorsis,
parçè che han de l'inzégn e buinis borsis;
ma chel che di citât j dá il bon ton
'e jé l'elètriche iluminaciôn.

Istât

Temporâl

*L'è il cîl dut impiât
l'è un timp'indiaolâd;
tempieste tan-che class;
ce fruçe, ce fradss.*

P. Zorûl. Un temporâl

Sintît çe businôr, sintît çe tons!
bombis, scaracavai e rochetóns
remenâ di tambûrs e tamburóns,
sclopetadis, zirândulis, canóns,
fûsetis, fusetonis, fusetóns,
e mortarèç che fan petâ s-ciassóns;
cun dut chist armamént indiavolât
di fuchs artificiai l'è ca l'istât,
Furlâns, parâi-si subit a sot-tèt,
o sot des coltris taponâi-si in jèt.
Dut chel che l'è ingrumât al si ûl sbrocâ;
jo nò sai di ¹⁾ çe che suçederâ.
Tempieste, tant che còculis
'e cole jú pa-i cops;
si sintin come scòpulis
sore i lastróns i sclops;
'e ven jú l'aghe a ciáriis,
la buere 'e sbat i scûrs;
Levânt, molât ²⁾ lis rêdinis
al ciaçe i nui a sburç,
Ponént movût da' invídie
j pete de altre bande
e la massárie in ciánive
a Dio si racomande;
e in mièç a tante fúrie
in mièç a tant bordèl
'e còr sù dute pâlìde
sençe siarâ il spinèl.

1) Ed. 1894 iò nò sai plui çe ch 'al suçedarà
2) molând.

Chei altris son in ciámere :
il pari al scusce i dinc,
i fruç di pôre 'e sgnáulin,
'e sberlin i parinc;
e in-t-ún ciantón la fèmine,
'e pree, sangloçe e vai,
e intánt che duc 'e çíulin
al cresc il tananai.
Par aer 'e svolin stríssulis
pulvín, plumís di uçeì,
'e van in sú lis còtulis,
e s-ciampin i ciapieì;
jú pe-s planis, pe-s stèulis,
pe-i sorchs e pe-i forménç
vegnin abáss a tòmbulis
rojúc, flums e torénç.
Son quartâç fûr i árbui,
son sbridinâç i ciámp.
Pin! Pon! sintít çe fulmins!
Zig! Zag! cialait çe lamps!
Entre l'aghe 'te-s ciánivis,
'e còr par i païs,
'e s-ciampín omps e fèminis
su-i cops plui muárç che vís.
E buere, tons, tempieste, ploje e lamps
'e rebaltin la muse al cîl e ai ciámps.
.....
Oh bastel! 'O soi za stuf di chist infíar
a dut chest malafín jo met ripâr:
.....
Levánt in-t-ún momént
al cámbie direción,
l'ûl fâ ancimò il testárd;
qualchi lamp, qualchi ton;
Garbín al volte stra-le
e Tramontán si bone,
dome Ponént. 't-e Basse
al scantine, al tontone.
Siròch al sburte i nui
j-u ciàçe vie lontán
corágio bavesele!
Dá-j-gi áncie tu une man!
La ploje si cujete,
i ciámps van disgotánd,
e ca e culà il soreli

pe-i nui al va cucánd.
Ánimo! duc insieme
dá-j-gi doi-tre sburtóns
a chei pôs nui che restin
a fâ ancimò i poltróns.
Eco: jé za sclaride
áncie l'aghe de roje; ¹⁾
Alegris! dut il cîl
'a l'è di-zá serén
e sore Mont Majôr
al splend l'arco-balén;
ses-o conténç, Furláns?
Si fâs chel che si pò:
il timp l'e vignûd sòl,
ma l'hai parât vie jo.

Pe-l vincenûv San Pieri al Nadisón
prepare un bal che 'l sará un vèr balón.

Lait su a Tarçint, fantâç, che jé gran
con iluminación de lis colinis: (sagre
fusetis, mortarèç e sclopetadis,
e une sdrume di bravis balerinis.

Lui

'O jesc di gnot a spacisâ solèt
pe-s colinis, pa-i ciámps e pe-s tavielis;
il ciáld al si è calmât, l'ajer cujèt
e nel cîl italián çimiin lis stelis.
'O ciali in alt: Epûr chist bièl çelèst
l'è chel istèss ch'al splend sore Trièst.

Sudi tant con chist ciáld, dis siore Zese,
ch'o devi squasi ogni mès cambiâ ciamese.

Al mi diseve un siôr domènie vot:
Caro Salvadi, par passár la noja
volete che prendiamo sú un cavallo
per fare una brillante trottatoia?

E ír sere al mi diseve: I miei nemali
li ho tutti in stalla dai miei coloniali.

Çe s-ciafojác, çe arsurre, çe calôr;
bisugne meti man al sborfedôr.

1) Viars azònc 'te ediç. 1894: 'e ven jú nete e
fres-cie - che fâs la biele voje.

MÒMOLO — Gnente ancora, ma siccome no se pol falar, mi bisogna che i preliminari li combina in tempo, prima che scopì la bomba. El sindaco Basandela....

TITUTE — (*interompin-lu*) prime figure porche di Surisíns.

MÒMOLO — (*continuând*) el par che non se occupi della fazenda. La lota la xe adesso fra lu e sior Genio...

TITUTE — (*interompin-lu*) seconde figure porche.

MÒMOLO — Ma el se consoli... ghe xe de mezo l'affar dei salami rânzedi e il padre dei poveri, come che i lo ciama, el resterà in tromba. Nol resta che lu.

TITUTE — Ma che Basandiele al vedi bandonade la lote?

MÒMOLO — I dise tuti che el sia innamorà, che la gran cota lo gabia slontanà dalla vita pubblica. Vedovo e sior....

TITUTE — (*sôl*) Ch'al mateáss cun Lúcie ch'al.... Che mostre di Cándide 'a rît un pôch masse... (*a Mòmo*) Sicchè così el diseva...

MÒMOLO — Mi dunque la saludo za podestà de Surisíns e adesso se'l pol, che no ghe xe premura, do parolete a quattro oci.

TITUTE — Altro! di ca, di ca, in buteghe, caro siôr Mòmo, segretari emerito, al vedará se d'acordo che larín noaltris. (*stan par jentrâ in buteghe ma Cándide anúncie*)

SCENE QUINTE

CÁNDIDE — 'E jè une siore di Udin che domande des paronis...

TITUTE — Alch di gnûf. Pete, pete Cándide, 'o vuez viódi-le iò prime des paronis. Disi-j che jentri (*a Mòmo*) Nò ha-l dite lui che nò l'ha premure'? Va, Cándide, fâ-le jentrâ (*vie*)

MÒMOLO — El fasa el fasa pur...

TITUTE — La distrighi in miêç minûf.

SCENE SESTE

(*Cándide 'e torne dentri e daûr di jè la sartore cun la borse in man*)

TITUTE — (*la sartore 'e salude*) Che si còmudi (*la sartore si sente con disinvoltura*) Cándide, fâs comodâ siôr Mòmo lã dentri e disnîci-gi une bosse di chês che ti hai mostradis îr. (*a Mòmo*) Al sintará ce marzemín. 'O soi cun lui dal momént.

MÒMOLO — Ghe xe tempo, el se comoda lui...

CÁNDIDE — (*a Mòmo*) Vueli-al comodâ-si?

MÒMOLO — Eccome pronto... (*al jentre in buteghe cun Cándide*)

TITUTE — (*sôl*) 'O sint che al sta par colâ-mi alch pe crúchigne un'altre volte... che, quând che scomensin... (*viârs la sartore*) 'O soi cun je: che mi disi mò, ninine, ce che comande.

SARTORE — 'O soi vignude a portâ i abiç ordenâç des sioris.

TITUTE (*al si grate il ciâf*) (*sôl*) Mi tratén juste parcè che jè une biele frute, ma se nò....

SARTORE — Forsit nò son in ciase?

TITUTE — 'E, son sí, e son.... E dulá sarèssin-o i vistîç... sí, vignarèss a sta-j il pach... la s-ciátule?....

SARTORE — (*mostránd la borse*) 'E son ca, 'e son ca...

TITUTE — (*al reste cu la bòcie spalancade*) E?!?!?!?

SARTORE — In cheste s-ciátule ch'o hai 'te borse. Al viodará ce modei... (*Titute nò l'ha flât par rispuindi e al si suie i sudòrs, la sartore continuând*) Al viodará ce robe (*'e viêrç la s-ciátule e 'a scomence a tirâ fûr vistîç che 'e slârgie su la táule*). Ûltime mode, siorút.

TITUTE — (*al si è butât jû su la ciadree e al ciale come stupidît*) Ma la morâl, la morâl dulá la mêtin-o? chêi peçòç alí nò bastin nance par taponâ la vergogne (*a la sartore che contíne il so lavôr*) E che lí'e sarèss l'últime mode? Ma cun chei sbréndui alí la me Lúçie 'e podará semeâ une di chês pôch di bon..... Madone sante!

SARTORE — Semeâ e nò jessi, siorút benedèt. Cumò 'e jé in voghe la limitaciòn in dut.

TITUTE — 'O hai gust di savê-lu.... specialmentri iò, capisc-je, ch'o devi tirâ fûr el tacuín. Par disgráçie 'o soi siôr Giom-Batta Lalella.

SARTORE — Orpo, a proposit, tan ben ve'. La parone mi ha tant racomandât di consegnâ-le propit a lui. (*'e jeve da borsute une lètare e la consegne*) A siôr Giom-Batta Lalella.

TITUTE — Ch'o soi iò (*al ciape la lètare, la viârz, la lei e al devente verd*) E mi ha ciacarât di limitaciòn (*al salte sù*). E cheste 'a si clamarèss limitaciòn? Mil e tresinte franchs sençe la fature? Ma nò sa-e che pocis mi-nd-ûl a ciapâ chei sbréndui e fâ dute une fertae? (*al va par cioli i vistîç*)

SARTORE — Par l'amôr di Dio is-al mat? Iò nò hai colpa.

TITUTE — (*al torne calm*) 'E jé vere... je 'e ha resón sa-e, ma iò....

SARTORE — Mi tirarèss fûr i vôi la me parone.

TITUTE — Mai miei? chei bieî vôi! (*sôl*) Ma se nò j foss di miêç la podestarie, che 'l folch-mi-trai al nassarèss un scandul ch'al farèss ciacarâ duc i sfueis dal mond. (*al clame*) Cándide, Cándide! (*Cándide 'e salte fûr de buteghe*).

SCENE SÈTIME

CÁNDIDE — (*jentránd*) Siôr Mòmolò al ha za disniçade une seconde boçe di Marzemín.

TITUTE — Beât lui - Ve' lí, intindi-ti tu cun chê siorute; s'o stoi ance-mò ca mi ven l'imbást (*al côr in buteghe*)

Cándide e la sartore solis

SARTORE — Mi clámi-e, par plasé, siore Lúçie. Cu-l siôr lá 'a si va pôch d'acordo.

CÁNDIDE — J voi dal lamp. (*'e passe donge a la táule e 'a si ferme*) Jesus ce bieî peciòç.

(*Continuarà 'te seconde dispense*)

Saràn anonciadis dutis lis prèdics che si tegnaràn par furlán cu-l non da l'oratôr e il teme che al sará svolzût. Cussì de dutrine.
Si pree di dâ-nus comunicacìon in timp.

Tarife des insercions

Un franch par perâule, pajamént anticipât. Nò si acetin che insercions in forme sèrie che nò fasin scomparì esteticamentri la publicacìon.

Gratis, almanco par une volte, l'anûncio di esercicis, negoçis, buteghis, istitucions che han la insegne in furlán e dei comerciant e professionis-c che han ciarte intestade e che tegin corispondençe ance par furlán.

Rosis e flôrs di mîl colôrs

Veramentri nò jé insegne ma une iscricìon dentri de buteghe dal

Gnûv Stabilimént Agricul Furlán

in contrade di Rialt, palâç comunâl, a UDIN, dulà che si ciate dut çe che si pò desiderâ in flôrs, maçèç, ghirlandis, semencis, pomârs e plantis di ort e di zardín. 'E vendin ance dut çe che l'ocôr pe' Apiculture.

Proprietari M. ZANIER - FATTORI - Telef. N. 206

Dolfo Carrara - VOCABOLARIO INTEGRATIVO FRIULANO - ITALIANO

Gorizia 1928 — Par ricevi-lu franch mandà 5.50 a l'autôr in Guriça, Ponte Isonzo, 11

PROSPETTIVE DELLE INDUSTRIE TURISTICHE DEL PIU GRANDE FRIULI

Ediç. di 80 esemplârs di 1000 páginis

L'ATLANTE LINGUISTICO ITALIANO

con 91 carte linguistiche. Ed. di 80 esemplârs di 192 páginis. I doi volúms (che no si vendin separatamentri) Fr. 35.00. Ordenâ-ju a l'Aministracìon de l'Archivi.

Spazio disponibil pe' reclám

Che cîr di tratà ben cui siei clienz e no à bisugne di reclám a jé la
Tipografie e Litografie di BEPO TABACH di Sandenêl

Gerént responsabil Dotôr A. TILIN

Librarie "Carducci," - Udin

Place dai Grans N. 13 (Place Vinc Setembar)

'E jé la vere librarie Furlane!!

Edicions pròpriis e principai libris in depuesit

CARLETTI. — Mariute, comédie	Franchs	5.—
CHIURLO. — Versi Friulani	"	4.—
" — Letteratura ladina del Friuli	"	5.—
" — Antologia della letteratura friulana	"	11.—
FERUGLIO. — Fúsignis. Prime dozene, ilustrade	"	7.50
" — " Seconde " "	"	15.—
" — Un grop sul stomi, comédie	"	4.50
" — L'ultin di Carnevâl lâ di Plet, comédie	"	2.50
LORENZONI. — Versi Friulani	"	8.—
MALATTIA DELLA VALLATA. — Villotte Friulane moderne e Vocabolario della parlata di Barcis	"	12.—
" — Canti della Valcellina	"	5.—
MARIONI. — Il Quarantevòl, comédie	"	5.—
" — Il Lirón di Siôr Bortul e il Canociâl de Contesse, dôs comèdiis	"	4.50
NARDINI. — Versi Friulani	"	6.—
Titute Lalele. El lunis	"	7.—

GRAND ASSORTIMÉNT

di libris di amene leture e di science, taliáns e forestîrs. = Românc, viâç. = Duc i libris pe-s scuelis. = Registros par comerciânc. = Ogèç di cancelarie e quadernos pe-s scuelis, pa-i uficis e pa-i municípiis.

Lavôrs di tipografie e legatorie ——— Artícuî par regâl

Depuesit di dutis lis dispensis da l'ARCHIVI DE LETERATURE FURLANE
La librarie 'e spedisc ai cliénç dispensis isoladis, conforme a l'ordinaçón.

—— Ribáss speciai pa-i Dopolavorís-c e pa-i Combaténç ——